

四明叢書

張宗祥



謁諸碩儒髦士拾其珠咳王睡於行卷中自以爲慶而其中猶未厭也行將去燕適齊栢大江而南訪金精於虎巨睇小朵於天竺蘆浮鯨波拜神現於小白華山下然後轉金陵出荆楚而歸在在求必儒林之作以實其卷而於茲題其卷曰叢林一覽祈先生言弁之嗟乎蜀之山水名天下而學浮屠者自以其術百家莫能先也珙生於蜀而馳萬里以覽四方學於浮屠而能內交吾儒博求其言議此與夫安甕天而矜坎井者何其異哉昔者司馬子長足跡半天下則以壯其文辭陳良北游

中國則以學周公仲尼之道其有是哉請有以語之
爾未出蜀時意蜀之山川至矣今覽之嶽鎮海瀆則向
之所見者何如也周孔之道豈直若海嶽而已哉聞而
慕之不若目覩而足蹈之也其以是惟之倘有志於
吾道也請更日而竟其說

少詹事劉公哀頌

有敘

古之抱德藝而艱屯天折爲世之所悲憐者當時德人
藝士必著辭以哀之尙矣今詹事府少詹事劉公秩登
從四壽餘六十且有子登甲科矣而其卒也眾咸哀之

若哀前所云者蓋公方以德行文章爲儲皇之所倚毗
後進之所矜式而僅止於下壽此所以爲眾之所哀也
余雖庸瑣曷能已其言乎公諱珰字宗器世家蘇之長
洲初以善書徵詣詞苑尋試京闈得雋已而擢中書舍
人累遷侍講學士國子祭酒陞今官云頌曰

大治鑄羣彙兮殊短修蜉蝣一旦兮雲鶴千秋撫余懷
其不嫌兮謂螭何壽而鶴何夭豈嗜奇而過論兮余斷
斷乎有道彼鬼瑣之旣育兮宜未齟而踣之胡俾其壯
而強兮疇不憾鬼誅之太遲欽摯旦之翼聖兮淳德普

而仁洋天雖愁遺以迫兮夫孰不欣欣而樂康公位
儲端兮年指使俄而疾兮倏而逝具僚盡兮庶士唏親
與故兮有涕滂而慨彼蒼之司人兮疇昭其昧斬三旌
與百齡兮胡不公俾蘭被皋而榮春兮芳迢迢其彌馨
樗隱駟於崇厓兮羣嗅之而狂醒淵飲瓢而聖慟兮誼
賦服於長沙豈轂丹與背台兮曄芳聞於幽遐公貴榮
而壽考兮允天命之有恆吾絜彼以量滋兮又何必增
唏乎永傷惟儲宮與翰苑兮眾顒望乎耆碩聿孤翹之
虎倒兮羣秀黯而無色景冰玉之雅操兮覽珠琲之昌

辭馨欬杳而莫聞兮矧髣髴乎丰儀吾乘迅霆以爲輪
兮策剛飈以爲駟上下四方而求公兮縹茫茫其不可
值誓仰高而行景兮幸典刑之具存驅跛鼃以追驥兮
聊寄恨於斯文

五松圖賦

客有厭華封之鞅掌慕栗里之盤桓睠三徑兮何許渺
雲海之漫漫興懷伊人欲審厥象一史儻儻偃宏之黨
始解衣而盤薄旋展素而從容灑墨成雨運毫生風忽
滿堂之撫掌見數子於雲泉之杪巖谷之中聯衽接纓

比肩交趾若喜而方親若怒而將離其數則滿八去三
盈七除二增戰國之一豪半宗周之十紂豈馬氏同氣
之常袁氏奕葉之公耶抑翰苑之螭鳳燉煌之稱龍者
耶或曰此先秦之大夫也猶有春秋之遺韻三代之芳
風爾其輪囷偃蹇礫硯崢嶸蓋所謂熊虎之狀虬螭之
形長鬣若楚人之相短髮若吳國之儵爛被練而組甲
紛執戟而持兵軒若賈勇俯若歆盟促若同浴而扶紛
若並濟而爭是其春秋之韻興若夫矯矯昂霄之姿挺
挺歲寒之節處至崇而不驕抱至剛而無虐文而不華

質而不俚澤而不濡泥而不滓羣居而不爭中立而不倚是其三代之風與余曰不然此十八公耳詩書之所贊詠尼父之所褒揚其生也鍾乾坤之正氣其長也表岱華之崇岡閱歷歲月凌摩穹蒼沐浴雨露之澤衣被日月之光時乎不用則清風高節足以振崖壑而傲風霜時乎用之則奇材偉器足以棟大廈而柱明堂也客曰唯唯否否此吾三徑之故人也類睢陽之宋老似山陰之漢叟秦皇帝不得而臣晉徵士不得而盡友昔與吾若金蘭之交今與吾若參辰之宿爰求肖似之眞以

慰離索之人也吾今辭斗祿卻五鼎解朝紱乘歸航將
隨五公者於廣莫之野無何有之鄉時挾其祕寶而食
之將後天不老而凋三光於是眾等皆大笑冠纓索絕
送美人兮南浦採驪珠以贈別

送徐教諭序

吾邑有俊爽介特之士曰徐君玉齕而塾焉髻而庠焉
其姿儀若瑤山瑠樹干青霄而輝白月其進止若雞羣
之鶴昂首而獨步其言論若鎔錙初淬曄然鋒鋔百鏗
而不折其文辭若奇味異珍蜚吻而刺目其氣志若一

鶚孤鶩俯視百鳥皆在其下風爲每文學之所程郡大夫之所試藩臬之所察多以君爲首選而棘闈大鑒君輒敗北低徊而返後生晚出賈其餘勇者與之對壘亦或反得雋爲能不龜手一也或以封或不免於泮澣綯豈獨用之異耶蓋亦有命焉耳以故鬱鬱居數十年始以歲貢來京師一日過余所劇談豪飲至夜半慨然謂余曰古者四十而仕後世以爲晚矣今余四十又加五而始入國學自是又且十數年而始得仕則視古人命大夫之年已過甚而前距致仕不遠矣其何晚如之蓋

余世之奇人也盛時邁往之志今盡化而灰矣茲欲與
儕輩上疏覓一文學掾爲之何如余應之曰君殆誑余
也夫爵爾則謬矣天有時地有氣春榮乎蘭秋榮乎菊
天時然也北山之木樹之南山則茂瘠土之苗種之沃
土則滋地氣然也子之得時與氣有在盍姑待之焉知
浙省京闈舉不捷稚壯耄老終不遇耶君曰吾且老不
可待矣卒行其言就試內廷爲第一得教延平之允溪
凡吾鄉之大夫士咸需言以贈其往嗟乎世有學屠龍
之技搏虎之能者縱不得龍與虎焉猶當得長鯨肥鯨

以爲鱸怒彪文豹以爲斲也區區一禽之獲豈其任哉
立志大而見功小此古昔之所喟也獨君玉乎哉雖然
古今之士有自下僚而陟崇位少不諧而老方達者多
矣孰謂君玉終於此乎淹哉請姑往

百耐庵賦

吾邑章先生廷玉始自鄉舉高第累官重慶府教授所
在名其燕處之齋曰百耐庵而求搢紳之言積成大卷
矣閒來京師復屬余言余閱其卷則寶墨華潤天葩陸
離迺楚王殿下之文與書冠於其首蓋先生之子銳被

選爲亞中大夫宗人府儀賓故獲寵賁若此而諸作亦
皆彬然可觀也從而問其所以百耐者則曰忿慾之火
熾於中不耐則不能修德毀譽榮辱之戟森乎外不耐
則不能聽天吾爲一文學而晏然處之若都尊官享重
祿吾其耐之功耶余旨其言迺爲賦之其辭曰

越有搢紳先生宦居於楚門不吝車室僅環堵楹敲不
支壁壞不補旁招日星上漏風雨蓬蒿之與鄰泉石之
爲伍榜曰百耐之庵日冥栖而燕處有華軒大夫文袴
公子聞其風聲議論颺起偕謂先生之處世也泉茗日

飲黍稻時炊不若老釋之徒能耐渴飢冬衣纊綿夏服
絺苧不若貆粵之人能耐寒暑步履舒徐不耐勞憊行
峻潔清不耐汙穢一耐之不能而況於百乎於是先生
之高第弟子相與爭之曰昔者先生年少氣銳謂勲業
可指取有謂名節可戾契致大欲覬廟堂之尊小猶希
藩臬之位頤指而左右奔趨跬步而前後呵衛志得敷
於時名得焯於世也然而數奇不耦志屈不伸名僅齒
於鄉舉秩不班於朝紳隨牒遠仕荒陬寂濱栖栖壇杏
采采蘋芹屹若槁壤之木塊若枯池之鱗於是下隸庸

夫樵人牧稚行偕友朋話相汝爾先生耐之寂若聆
不睇乞乞勇夫截截調子盛氣橫侵巧言深詆先生耐
之視若一蚊一蟻同寅並座之儒鼓箏踵堂之士或逝
梁而譖蘇閒彎弧而射羿先生耐焉不怨不忮列藩專
城之官衣繡持斧之使或怙寵而作威亦竊權而張勢
先生耐焉不侮不畏至若墜粥不啜盜泉不棄耐茲飢
渴列仙不如炎天盛服雪夜勸書耐茲寒暑胡粵不殊
皓齒傾國翠筓倚門先生耐之寧樂綦巾盛富賈怨積
財囹圄先生耐之四壁寧空五侯之第先生耐而不至

七貴之間先生耐而不趨警枕若馬運甓若陶晨朝吃
吃不耐何勞裸裎與偕舊惡罔記行兼惠夷不耐何穢
在昔宣尼不報無道亦有子淵犯而不校耐之上也出
胯不辭起爲漢將唾面不拭任爲唐相耐之次也獨不
見夫十月之雷乎形藏地中可掘而食及其奮迅則震
撼乎八極又不見乎百川之源乎濫觴於土可壅而止
及其決溢則奔注於四海龍耐而蟄乃躍于淵鵬耐而
伏乃翔于天故事必有忍而後有濟人有不爲而後可
以有爲子焉知先生之能耐又焉知耐道之盛至於斯

於是二子慚伏而去先生聞之顧弟子曰誰使爾多言
哉泊然而休澹然而處舉一世之斷斷無足以芥蒂其
靈府也

倦游辭

久客兮倦游蹇將返兮故丘靡靡兮遙睇山金螺兮白
鷺洲葺屋兮西滌白雲爲扉兮層波爲砌渙塵編兮滿
牀衣芳荷兮飯芰簞席兮鷺鷥宵與胥寢兮旦胥與遊
澹容與兮安命羌富貴兮不可以苟求

祭李祭酒先生文